

Rauduons vakars Barstītius mona vaikīstie

Rauduons vakars nu mēška
Lietā praejē pru numus –
Ēr vēsos kaims pasikluojē
Rauduona auksa kélēmus.

Longā užsiplēiskē švēiso rauduono,
Šiaudinis stuogs – auksēnē,
Vuo šulinie vondou sublēzga
Rauduono sēdabro dognē...

Kelio vēnuos trobalēs šeimīnīks
Parvažiava nomēi rauduonās arklēs
So pēlno vežēmo rauduona šēina,
Lēipsnuodams rauduonās marškinēs.

Dejava kelkraštīe rauduonas smēlgas,
Rauduons vies lomkstē jazminus –
Koplītstolpē šešielis ēlgs
Par griuovi linka i daržus...

Vo anuo senuo pakrīposie pastuogie
So drabužēs prietemuo baltās
Sīdiejē nebīli švēntuoji
Šērdie so dorklās krovēnās.

Veiziejē ana i rausva vēiškeli,
I kleva, sožeista karē,
Artiejunti par lauka žmuogo
Tuokiame rauduonam vakarē.

Ēr vies žvīrkelie dā žaidē –
Gainiuojē dolkēs sokorēs,
Ateinontē lazda rauduona
Žibiejē auksa spīdulēs.

Uns karto so vakaro atejē
Kap lēipsnuom rauduonās plaukās
Ēr meldies, ka douto anam rītuojo
Ta švēntuoji apdarās baltās.

Nulēdēs pavargosē galva,
Švēisuos nutvēiksto drabožio,
Atruodē, kak lūpa švēntasis,
Atejēs so Dēiva žuodio.

Vo kuojēs soscērdosēs, basas,
Ēlga isidraikiusi barzda –
Ēr bērstuntis žuodē i delnus
Iš lūpu karštiausē maldo...

Ar anam kas tumet davē dounas?..
Lašieli atnešē vondens?..
Šiaudu saujelē a pakluojē?..
Ka pasikēštē pu galvuos ēiškuojē akmenēis...

Tiktā pēlka akmini pu galvuos pasikēšēs,
Tas elgeta veiziejē i žvaigždēs –
Anuo akis bova mielēnas kap gielēs,
Katraš pavasaris onkstēi atneš...